



Reykjavíkurborg

SAMÞYKKT UM GÖNGUGÖTUR Í REYKJAVÍK

Kaflí I

1. gr. *Gildissvið*

Samþykkt þessi gildir um göngugötur í veghaldi Reykjavíkurborgar.

2. gr. *Umferð vélknúinna ökutækja um göngugötu*

Umferð vélknúinna ökutækja um göngugötu er óheimil öðrum en þeim sem er sérstaklega heimilaður akstur samkvæmt 10. gr. umferðarlaga, þjónustubifreiðum á vegum borgarinnar, íbúum og rekstraraðilum með göngugötukort samkvæmt 4. gr. og öðrum aðilum með sérstakt afnotaleyfi borgarinnar samkvæmt 5. gr.

Við akstur um göngugötu skal gæta fullrar varúðar, sýna gangandi vegfaranda sérstaka tillitssemi og víkja fyrir honum. Eigi skal aka hraðar en 10 km/klst. og ef mikil umferð gangandi er um götuna skal leitast við að finna aðra leið. Vélknúnum ökutækjum má ekki leggja í göngugötu nema á merktum stæðum.

3. gr. *Vörulosun*

Umferð vélknúinna ökutækja til vörulosunar er heimil á tilgreindum vörulosunartíma á hverjum stað fyrir sig. Taka skal tillit til stærðartakmarkana vélknúinna ökutækja sem í gildi eru á hverjum stað.

Vörulosun sem fer fram án notkunar vélknúinna ökutækja, svo sem með rafknúnum reiðhjólum, rafknúnum trillum eða sambærilegum tækjum er eftir sem áður heimil utan vörulosunartíma.

Við vörulosun skal sýna gangandi vegfarendum tillitssemi, hvort sem notast er við vélknúð ökutæki eða ekki.

4. gr.

Göngugötukort íbúa og rekstraraðila

Íbúar og rekstraraðilar sem samkvæmt gildandi deiliskipulagi eða samþykktum lóðaruppdráttum, þar sem ekki er í gildi skipulag, hafa aðgang að bílastæði á lóð fasteignar sem ekki er aðgengilegt með öðrum hætti en akstri um göngugötu, geta sótt um göngugötukort.

Eingöngu er gefið út eitt göngugötukort fyrir hvert bílastæði sem uppfyllir ofangreind skilyrði. Áður en ekið er um göngugötu skal kortinu komið fyrir með áberandi hætti í eða á ökutæki.

Lögreglu er heimilt að leggja hald á göngugötukort til bráðabirgða ef grunur leikur á um misnotkun þess og skal þá afhenda Reykjavíkurborg kortið. Afturkalla skal kort ef um misnotkun er að ræða.

5. gr.

Leyfi til tilfallandi notkunar á göngugötu

Aðrir íbúar og eða rekstraraðilar við göngugötu og nærliggjandi götur, geta fengið leyfi til tilfallandi aksturs á göngugötu utan vörulosunartíma við sérstakar aðstæður t.a.m. við flutninga eða stærri framkvæmdir.

Við umsókn skal taka fram ástæður þess að ekki sé hægt að nýta skilgreinda vörulosunartíma eða léttari fararmáta samanber 2. mgr. 3. gr. samþykktarinnar.

Kaflí II

6. gr.

Viðburðir á göngugötu

Viðburður á göngugötu má ekki valda ónæði fyrir íbúa eða rekstraraðila né skapa hættu eða hefta umferð eða aðgengi. Viðburður með tónlist skal taka mið af reglugerð um hávaða nr. 724/2008.

Eftirfarandi viðburðir eru heimilaðir á göngugötu án sérstaks leyfis Reykjavíkurborgar:

- a. Viðburður án tónlistar með allt að þremur listamönnum er leyfður alla daga frá kl. 10.00 - 20.00 að því gefnu að listamaður færi sig að minnsta kosti um 50 metra frá fyrri staðsetningu á klukkustundarfresti.
- b. Tónlistarviðburður með allt að fjórum flytjendum er leyfður frá kl. 14.00 - 20.00 á virkum dögum og frá kl. 12.00 - 20.00 á laugardögum og sunnudögum að því gefnu að flytjandi færi sig að minnsta kosti um 50 metra frá fyrri staðsetningu á klukkustundafresti.

Aðrir viðburðir eru háðir afnotaleyfi frá Reykjavíkurborg.

7. gr.

Útveitingar og ústillingar við göngugötu

Rekstraraðili við göngugötu getur fengið leyfi Reykjavíkurborgar til afnota af borgarlandi til útveitinga eða ústillinga fyrir framan rekstur sinn. Ekki skal veita leyfi fyrir afnotum ef þau skerða flæði gangandi vegfarenda eða annarrar umferðar, þar með talið neyðaraksturs, samanber reglur um afnot af borgarlandi vegna útveitinga og reglur um afnot af borgarlandi vegna skilta og ústillinga.

Afnot af borgarlandi til útveitinga skulu eingöngu ná til opnunartíma viðkomandi veitingastaðar, þó aldrei lengur en til klukkan 23.00.

8. gr.

Götu- og torgsala

Öll almenn götu- og torgsala er bönnuð á göngugötum og torgum nema með leyfi Reykjavíkurborgar á úthlutuðu svæði í samræmi við samþykkt um götu og torgsölu í Reykjavík.

9. gr.

Skilti og auglýsingar við göngugötu

Rekstraraðili getur fengið leyfi Reykjavíkurborgar til afnota af borgarlandi fyrir auglýsingar í samræmi við reglur um afnot af borgarlandi vegna skilta og ústillinga. Skilti og auglýsingar skulu vera í samræmi við samþykkt um skilti í Reykjavík.

10. gr.

Lagastoð og gildistaka

Samþykkt þessi, sem sett er samkvæmt heimild í 1. og 2. mgr. 10. gr., 1. mgr. 84. og 2. mgr. 86. gr. umferðarlaga nr. 77/2019, með síðari breytingum, tekur þegar gildi.

Skipulags- og samgönguráð getur kveðið á um önnur sérákvæði fyrir ákveðnar göngugötur, í samræmi við 84. gr. umferðarlaga nr. 77/2019, eftir því sem þurfa þykir og gilda þau þá framar ákvæðum þessarar samþykktar.

**Samþykkt á fundi skipulags- og samgönguráðs þann XX. nóvember 2021
og á fundi borgarráðs þann XX. nóvember 2021.**